

<><><><><><>

एह आकाशवाणी जम्मू ऐ, बड्डलै खबरें च तुंदा सुआगत, पैहले खास-खास खबरें कन्नै में पंकज कोहली।

Headlines

1. अखनूर च सेना दे काफिले पर गोलीबारी करने आले आतंकवादिं चा जवानें इक गी तारी मकाया, दऊं दे छप्पे होने दी शैंका तपाशी अभियान जारी।
2. उपराज्यपाल मनोज सिन्हा होरें कश्मीर च सुरक्षा ते विकास दी समीक्षा कीती, आतंकवाद गी दना क बी बर्दाश्त नेई करने दी नीति अपनाने दा आह्वान कीता।
3. मुख्यमंत्री उमर अब्दुल्ला होरें सुधारें ते मता पैहा जुटाने दी पैहल पर जोर पाया माली मैहकमे दे कम्मकाज दी समीक्षा कीती।
4. प्रधानमंत्री नरेन्द्र मोदी होर 70 ते ओह्दे शा बद्ध बरें दी बरेसू आले सब्बने बुजुर्गे लेई अज्ज सेहत कवरेज दा विस्तार करगन।

<><><><><><>

Terror Attack

अखनूर सेक्टर च सेना दी इक गड्डी पर कल आतंकवादी हमला होआ, इस दरान शुरू होई दी गोलीबारी च इक आतंकवादी मारेआ गेआ ऐ। आकाशवाणी जम्मू संवाददाता दी रिपोर्ट मूजब आतंकवादी दी लोथ ते थेआर बरामद करी लैते गे न। एह हमला कल बड्डलै होआ, आतंकवादिं सेना दी कानवाई दा हिस्सा इक अम्बुलेंस पर गोलियां चलाइयां। मन्नेआ जा'रदा ऐ जे त्रै आतंकवादी हमले च शामिल हे। हमले मगरा आतंकवादिं गी फगड़ने लेई इलाके च तपाशी अभियान रंभेआ गेआ। कल तपाशी अभियान दरान इक आतंकवादी मारेआ गेआ हा ते 2 आतंकवादी अजें बी छप्पे दे न ते उनेंगी फगड़ने लेई अभियानदुए दिन बी जारी ऐ।

<><><><><><>

LG-Meeting

उपराज्यपाल मनोज सिन्हा होरें कश्मीर संभाग दे सब्बने जिलें च सुरक्षा स्थिति ते विकास पैहलुएं पर कल श्रीनगर च लग्गी दी बैठक दरान समीक्षा कीती। श्री सिन्हा होरें सुरक्षा ग्रिड दे कम्मकाज दा जायजा लैता ते सरबंघत अधिकारिं गी निर्देश दित्ते जे आतंकवादी खतरे गी ध्यानै च रखदे होई हर चुनौती कन्नै निबड़ने लेई तैआर रौहन। उनें गल्ला ऐ पर जोर पाया जे राश्ट्र बरोधी प्रचार करने आलें सार्वजनिक सुरक्षा ते कनून बवस्था गी देह पजाने आले खलाफ सख्त कारवाई कीती जानी लोड़चदी। उपराज्यपाल होरें आतंकी ढांचे दे खात्मे ताई उनेंगी दना क बी बर्दाश्त नेई करने ते सुरक्षा अजेंसिं बश्कार बेहतर तालमेल ते सौहगे होइयै कम्म करने दा आह्वान कीता। उनें गलाया जे नार्को आतंकवाद कन्नै फौरी तौर पर निबड़ेआ जाना लोड़चदा।

<><><><><><>

Chief Minister

मुख्यमंत्री उमर अब्दुल्ला होरें वित्त मैहकमे दी प्रगति ते कम्मकाज दा जायजा लैता। मुख्यमंत्री होरें केन्द्र प्रयोजित स्कीमें ते राजस्व सरबंधी कम्में कारवाइएं दा जायजा लैता ते सराहना कीती। उनें केन्द्र सरकार आस्सेआ सीएसएस लेई उपलब्ध फंड बारे बी जानकारी हासल कीती। चालू ब8रे लेई 10 जहार 3 सौ करोड़ रपे बागुजार करोआए गे न। जिसलै कि 2022–23 च 6 जहार 3 सौ 86 करोड़ रपे दे 2021–22 च 3 जहार 992 करोड़ रपे उपलब्ध करोआए गे न। मुख्यमंत्री होरें प्रशासनिक सचिवें गी अपने अपने मैहकमे दे कम्मकाज दा जायजा लैने लेई गलाया तां जे लोकें गी बेहतर सहूलतां उपलब्ध करोआइयां जान।

<><><><><><>

Rajouri Security(byte)

राजौरी जिले आली कब्जा रेखा कन्नै लगदे इलाके च सुरक्षा इंतजाम, हाल च होए दे आतंकवादी हमले मगरा होर व्यापक ते निगगर कीते गे न। कब्जा रेखा कन्नै लगदा इलाका बड़ा गै संवेदनशील ऐ की जे इत्थुआं आतंकवादी घुसपैठ करने दी फिराक च रौहदे न। सेना लेई एह घुसपैठ दियां कोशश चुनौती पूर्ण कम्म न। इनें चुनौतिएं कन्नै निबड़ने लेई सेना आस्सेआ नमें उपकरणों दा इस्तेमाल कीता जा'रदा ऐ, जेहदे क्वाडकाप्टर निगरानी लेई अज्जै कल्लै दे उपकरण, थेआर ते ड्रोन बगैरा शामिल न। एह सारियां चीजां नमीं तकनीकें ते नमिएं काह्दे गी अपने कम्में लेई अपनाने प्रति सेना दी वचनबद्धता गी दर्शादियां। मुख्य दे बन्ने दी हिफाजत लेई एह जुआन हर संभवन कोशश करदे न। पेश ऐ इस बारे आकाशवाणी संवाददाता दी

<><><><><><>

Satish Sharma

खुराक, नागरिक आपूर्ति ते उपभोक्ता मामले सनें ट्रांसपोर्ट युवा सेवा दे खेड्ड मैहकमे दे मंत्री सतीश शर्मा होरें कल खौड़ दा व्यापक दौरा लाया। इस दरान उनें 10 लख रपे दी अंदाजन लागत कन्नै बनने आलीबुजवाल थमां गिरगरियाल शिडकें पर लुक पोआने दे कम्में दा नीह पत्थर रखेआ। इस मौके हनुमान चौक, मैरा जोड़िया ते त्रौटी सनें बक्ख-बक्ख इलाकें दे लोक मंत्री हुंदे कन्नै मलाटी लाइयै अपनिएं दिक्कतें-परेशानिएं ते चैताएं कन्नै अवगत करोआया। उनें लम्मे विरै थमां बकाया पेदी मंगें शकैतें गी तौले दूर करने लेई मंत्री हुंदी दखलअंदाजी दी मंग कीती। श्री शर्मा होरें लोकें गी भरोसा दोआया जे उंदे आस्सेआ पुट्टे गेदे मुद्दें गी सरबंधत अफसरें अग्यै पुट्टगंन ते घट्ट शा घट्ट समें च उंदा नबेड़ा कीता जाग।

<><><><><><>

DIPR Vigilance

सूचना ते जन संपर्क निदेशालय जम्मू आस्सेआ सर्तकता जागरूकता सप्ताह दे सरबंधै च सगंध चुक्कने आले कार्यक्रम दा कल सरिस्ता कीता गेआ। जम्मू च जायंट डरैक्टर इनफरमेशन अतुल गुप्ता हुंदी अगुवाई च सगंध चुक्कने आले कार्यक्रम दा सरिस्ता कीता गेआ। इस मौके पर उनें मज्जुद सारे अफसरें ते होरने गी इमानदारी सरबंधी सगंध दोआई। अपने संबोधन च गुप्ता होरें लोक सेवा दा इमानदारी दी महत्वपूर्ण भूमिका गी उजागर कीता। सर्तकता जागरूकता सप्ताह असेंगी अपनी सेवा च उच्च म्यार आली भूमिका इमानदारी ते पारदर्शिता जकीनी बनाने लेई चेता दोआंदा ऐ। गुप्ता होरें इनें नैतिक मुल्लें गी अपने जीवन च अपनाने लेई बी गलाया।

<><><><><><>

PM

प्रधानमंत्री नरेन्द्र मोदी होर अज्ज धनवंतरी जयंति ते 9में आर्युवेद दिवस दे मौके उप्पर नमीं दिल्ली च स्वास्थ्य सरबंधी तकरीबन 12 जहार 850 करोड़ रपे दी लागत आली केई परियोजनाएं दा उद्घाटन ते नीह पत्थर रखगंन। मोदी होर आयुष्मान भारत प्रधानमंत्री जन अरोग्य योजना च 70ए बरें ते एहदे शा बद्ध उमरी दे नागरिकें गी बी शामिल करने दी योजना दा बी शुभारंभ करगंन। एहदे कन्नै सब्बै आय-वर्ग दे

वरिष्ठ नागरिकें लेई स्वास्थ्य सुविधा सखल्लियां होई जांगन। स्वास्थ्य सुविधाएं गी बेहतर बनाने लेई प्रधानमंत्री होर केई स्वास्थ्य संस्थानें दा उद्घाटन ते नीह पत्थर रखगंन। ओह देश दे पैहले अखिल भारतीय आयुर्वेद संस्थान दे दुए-गेड़ दा बी उद्घाटन करगंन।

<><><><><><>

PM-Rojgar

प्रधानमंत्री नरेन्द्र मोदी होर अज्ज वीडियो कांफ्रेंसिंग राएं बक्ख-बक्ख विभागें च 51 ज्हार शा बद्ध नमें नियुक्त कर्मचारिएं गी उंदे नियुक्ति पत्र सोंपगन। साढ़े संवाददाता नै जानकारी दिक्ती ऐ जे एह रोजगार मेला देश दे बक्ख-बक्ख 40 थाहरें उप्पर आयोजत कीता जा'रदा ऐ। एह मेला रोजगार दे मौके उपलब्ध करोआने आली प्रधानमंत्री हुंदी वचनबद्धता गी दस्सदा ऐ। बक्ख-बक्ख मंत्रालय ते मैहकमे च केन्द्र सरकारै च शामिल होने आले नमें नियुक्त लोकें गी कर्मयोगी प्रारम्भ राए बुनियादी सिखलाई लैने दा मौका थोआ ऐ।

<><><><><><>श

Jal Shakti Minister

जल शक्ति ते जनजातिय मामले सरबंधी मंत्री जावेद अहमद राणा होरें कल मेंढर दा व्यापक दौरा लाया। इस दरान मंत्री होरें विकास कम्में, विकास सरबंधी जरूरतें ते मकामी लोकें दिएं आसे-तांगें दा पता लाने दे अलावा उंदी शकैतें दा बी जायजा लैता। उनें अफसरें थमां इलाके च जारी विकास कम्में बारे पुच्छेआ ते उनेंगी हिदायत कीती जे ओह कम्में दी रफ्तार गी तेज करन तां जे लोक हित आले इनें कम्में दा लाह लोकें गी थोई सकन। मंत्री होरें मकामी स्कूल दा दौरा लाइयै विद्यार्थिएं ते अमले कन्नै गल्लबात कीती ते उपलब्ध सहूलतें बारे पुच्छेआ पछाया।

<><><><><><>

CSIR

सीएसआईआर-आईआईआईएम जम्मू नै अरोमा मिशन आली अगरवत्ती उत्पादन सरबंधी इकाई दा उद्घाटन कीता। इस सुविधा राएं मती ते उच्च म्यार आले उत्पादन जकीनी बनाग। एह जतन करसानें, आप सहायता समूहें, महिलाएं, युवाएं ते स्टार्टअप सरबंधी जतनें गी बढ़ावा देने दा इक जतन ऐ। अगरवत्ती दे उत्पादन सरबंधी इकाई दा उद्घाटन सीएसआईआर आईआईआईएम दे निदेशक डॉ.जवीर अहमद होरें कीता आकाशवाण कन्नै गल्लकरदे होई आखेआ

<><><><><><>

BIS

भारतीय मानक ब्यूरो बीआईएस नै उपभोक्ताएं गी सौहगा करदे होई आखेआ जे ओह धनतेरस दे उपलब्धा च सोने-चांदी दी खरीददारी करदे मौके मता सोची समझियै गै पुट्टन। उनें हालमार्क दे मार्के आले भरोसेमंद गैहने गै खरीदने लेई जोर भरेआ। खुराक उपभोक्ता मामले ते सार्वजनिक बंड बिक्री मंत्रालय नै इक ब्यानै च आखेआ ऐ जे धनतेरस ओ मौका होंदा ऐ जदूं परोआर सोने च रास पूंजी लांदे न। उनें गलाया जे उपभोक्ता बीआईएस हालमार्क ते सखल्ले गै इस्तेमाल होने आली बीआईएस केयर ऐप राएं गेहने दी खरीददारी दी प्रमणिकता बारे अपने आप गी जकीनी बनाई सकदे न।

<><><><><><>